

## zuzendariari

(0034) 943 300 222



zuzendariari@egunkaria.com



Martin Ugalde kultur parkea 20140 Andoain

Hipokrisia nagusi  
Oiongo udaleanAngel Martin (Sozialista Abertzaleen  
zinegotzia Oionen)

Azken hilabetetan hipokrisia nagusitu da Oiongo udaleko gobernu batzordean, eta hori erakusten saiatuko naiz eskutitz honen bidez.

Ni joan den hilean Oiongo PNVko alkateak egindako mehatxuak jaso zituen Sozialista Abertzaleen zinegotzia naiz. Hilabete luze pasatu da hori gertatu zenetik, eta Oiongo PNV-EAko zinegotzi guztiek eta udaleko idazkariak bat egin dute alkatearekin mehatxu horiek estali nahian.

Joan den ostiralean osoko bilkura izan genuen udaletxean, eta bertan onartu behar zen aurreko osoko bilkuraren akta, Ezker Abertzalearen aurka eta nire aurka ai-

patutako mehatxuak gertatu zirenekoa, hain zuzen ere. Idazkariak, ohi bezala, Alkatearen gustuko akta egin zuen, mehatxu horiek aipatu gabe eta aktaren bukaeran alkatearen ahotan «*vamos a ir a por vosotros con las mismas*» esaldia jarrita. Benetan esan zuen esaldia ikusteko «*pipas*» hitza «*mismas*» hitzaren ordeztu jarri behar da, eta ez zen plenoaren bukaeran esan, gai zerrendaren 6.1 puntuan baizik.

Nik, txaketan pipa bat zuela esanez nire burua mozteko mehatxua bilkura bukatuta egin zuelako aktan ez sartzea ulertzen nuela esanez, proposamen bat egin nuen, beste mehatxua esandako hitzekin dagokion lekuan sartuta akta zuzentzeko. Honen aurrean, nik esandakoa egiaztatzeke bilkura grabatua duen zinta bertan zegoen, aldaketak onartu behar ziren edo, bestela, ez sartzeko motiborik izatekotan esateko.

Ez bata, ezta bestea ere. Bilkuran parte hartu zuten PNV-EAko bost zinegotziek —alkatea ez zen joan—, inolako azalpenik eman gabe, proposamenaren kontra bozkatu zuten, eta, egia islatzen ez zuela jakin arren, idazkariaren akta onartu zuten.


Bilkura bukatzeaz zegoela, PNV-EAko zinegotziek osatzen duten Gobernu Batzordeak panfleto bat aurkeztu zuen, alkateari herrialdeko PPko buruzagi batzuekin duen liskarrean babesa eskainiz. Bertan, talde politikoei gezurra politikan ez erabiltzea *exijitzen* zieten, eta beste taldeko zinegotziei zintzeko eskatu ziguten. Aurrekoa ikusita, ez da harritzekoa hori aurkeztea, egia estali eta gero, «hipokrita eta iraingarria» zela esan nienean ez ematea inolako erantzunik.

Alkatea ez zen bilkurara joan, baina askotan erakutsi digu bere jarrera. Besteak beste, oso garbia da iazko *inozentada*. Oso-

ko bilkuran, abenduaren 28an, galdetu nion zer gertatu zen Ur Partzuergoak ur zerbitzua kudeatzeko kontratatua zuen enpresarekin, esamesak entzunak nituelako. Aktan jasota dago ezer ez zekiela esan zidala, baina ez nola egiten zuen barre hori udala, eta ez ur partzuergoa, zela esanez. Ur Partzuergoak batzarra egin zuen —aktak, behintzat, hori esaten du—, bi egun lehenago; Oiongo alkateak Oiongo Udalaren ordezkari gisa parte hartu zuen, eta ura kudeatzeko kontratatua zuen enpresarekiko kontratua amaitutzat ematea erabaki zuen. Beraz, alkateak, ontzat hartzen badugu aktak dioena, gezurra esan zuen.

Gutun hau kaleratu dut Oiongo jendeak jakiteko zer-nolako agintariak dituen udalean eta Oiongo Sozialista Abertzaleen ize-nean ustelkeria eta gezurren auka azaltzeko konpromisoa berritzeko.

## montxo



## galdeiozu... ?

OSKAR  
GOÑIUdalbiltzako  
Batzorde Eragileko  
koordinatzailea

**Nazioarteko Konferentzia antolatu duzue, baina aurrerantzean nazioarteari begira zer gehiago egin daiteke? Euskal Herriaren eskubideak bermatzeko zer laguntza eduki dezakegu?**

Jon Ruiz (Donostia)

Nazioarteari begira, Euskal Herria herri bat dela azaldu behar dugu. Eskubideen subjektua den herri bat, eskubide horien urraketa sufritzen duena. Mezu hori ahal den leku gehienetara hedatu behar dugu, eta herrialdeen babesa jaso. Nazioarteko Konferentziak erakutsi digu Euskal Herriaren eskubideen aldeko pertsona ugari bil ditzakegula mundu osoan. Fase horretan gaude. Hortik aitzinera, Madril eta Paris gobernuen jarrera aldarazteko urratsak zehaztu beharko dira.

Abenduaren 10etik aurrera **Pantxoa Carrere • Abeslaria** izango da Galdeiozu ataleko gonbidatua. Bidali zure galderak ordurako.  
[galdeiozu@egunkaria.com](mailto:galdeiozu@egunkaria.com)

## hirusta



Itziar Madina

## Amaierarik gabeko ipuina

**S**ekula amaitzen ez den ipuina nahi duzu kontatzea?». Horrela luzaz atxiki daitezke haurrak, umorea eta pazientzia galtzen ez duteno. Galizian gertatu eta segitzen ari dena «harrigarria» dela diote denek. *Prestige* petroliontzia isurketaz Galiziako nola Espainiako agintariak ezjakintasuna erakutsi dute, baina bereziki jendearekiko eta ingurumenarekiko mespretxu izugarria. Olatu koipetsu beltzak ikustea, gezalak darrion usain gazi-gozoaren partez fuelaren pozoia arnastea, norberaren ogibidea harkaitzen eta uhinen aurkako borrokatik ere ezin gehiago ateratzea... edonoren gogoia birrintzekoaren heinekoa dela ezin uka. Aurrerapenak duen saria. Gaur Galiziak du ordaintzen, eta ez du ez lehen ez azken aldian. Atzo, Britainia izan zen, Baltikoa, edo nik dakita munduko zein itsaso zabal. Laster Armin-tzan, Bakion, berdin Ondarroan, Getarian eta

Zarautzen, Miarrizen eta Angelun izanen ditugu tatxa beltz higuigarriak. Espainol buruzagiek txistuka zeruari begira, diru pixka batez lagunduz Galiziako arrantzaleak, Mediterraneoko hondartzetara joanen dira, han erretzeko. Ontziaren jabea? Petrolio saltzailea? Edozein uharte basatitan egonen dira, lurra ustiatzen duten bezala, jendeak eta haien bizimoldeak kolonizatzen, visa-txartelaz eta sakelako telefonoez kapitalak higiarazten. *Erika* ontziaren kasuan frantses estatuk gauzak eskuetan hartu bazituen, aberriaren dei sutsuaz hiritar guziak militarren ondoan jarri bazituen, eskularru, pala eta baldeekin zikinkeria beltza plaietatik ateratzen, besteak beste Britainia turismo-lekua delako izan zen. Bietan, Galizian zein Britainian, kargu edo gorbatahun guti joan da eskuak zikintzera, zer aipa petrolio enpresakoez. Eta hau balitz finitzen ez den ipuina?